

18.

In festo Corporis Christi. Ad Vesperas.

1. Pange lingua gloriosi
Corporis misterium,
Sanguinisque preciosi;
Quem in mundi precium
Fructus ventris generosi,
Rex effudit gentium.
2. Nobis datus, nobis natus
Ex intacta virgine,
Et in mundo conversatus
Sparso verbi semine;
Sui moras incolatus
Miro clausit ordine.
3. In supremæ nocte coenæ
Recumbens cum fratribus,
Observata lege plene
Cibus in legalibus,
Cibum turbae duodenæ
Se dat suis manibus.
4. Verbum caro panem verum,
Verbo carnem efficit,
Fitque sanguis Christi merum
Et si sensus deficit;
Ad firmandum cor sincerum
Sola fides sufficit.

5. Tantum ergo sacramentum,
Veneremur cernui,
Et antiquum documentum,
Novo cedat ritui;
Prestet fides supplementum
Sensuum defectui.

6. Genitori, genitoque
Laus, et iubilatio.
Salus, honor, virtus quoque
Sit et benedictio;
Procedenti ab utroque
Compar sit laudatio. Amen.